

**FRÁSÖGN**

*af fundi stjórnarnefndar Evrópuráðsþingsins í Zagreb 1. júní 2018*

Af hálfu Íslandsdeildar Evrópuráðsþingsins sótti fundinn Rósa Björk Brynjólfsdóttir, formaður, auk Bylgju Árnadóttur, alþjóðaritari. Fundurinn var haldinn í Zagreb í Króatíu en landið fer með formennsku í Evrópuráðinu um þessar mundir. Á dagskrá var barátta gegn orðræðu hryðjuverkasamtaka, aukin fjölbreytni í stjórnámum í Evrópu og aðbúnaður fatlaðra fanga.

Marija Pejčinović Burič, utanríkisráðherra Króatíu og formaður ráðherranefndar Evrópuráðsins, kynnti áherslur króatískra stjórnvalda meðan á formennsku landsins í Evrópuráðinu stendur. Króatísk stjórnvöld hygðust leggja áherslu á baráttu gegn spillingu, vernd þjóðernisminnihluta og annarra hópa sem standa höllum fæti, styrkingu svæðisbundinna stjórnvalda og verndun menningararfs. Pejčinović Burič sagði fjárhagsvanda ráðsins stefna vinnu þess í hættu og benti á nauðsyn þess að endurskoða framlög aðildarríkja með tilliti til verðbólgu síðustu ára. Gordan Jandroković, forseti króatíska þingsins, ávarpaði einnig fundinn. Hann sagði Króatíu hafa gefið skýr skilaboð við inngönguna í Evrópuráðið árið 1996 um að aukin samvinna og samruni Evrópulanda væri forgangsmál hins nýstofnaða ríkis. Króatísk stjórnvöld stæðu með Evrópuráðsríkjum að verndun sameiginlegra gilda um lýðræði, mannréttindi og réttarríkið. Hann lýsti ánægju sinni með áherslur króatískra stjórnvalda á formennskutímabilinu. Sérstaklega væri mikilvægt að vernda sameiginlegan menningararf Evrópulanda. Með því að beina sjónum að því hvað sameinaði Evrópulönd væri hægt að sigrast á þeim áskorunum sem blöstu við og þróa lýðræðishefðina til hagsbóta fyrir komandi kynslóðir.

Á fundi stjórnarnefndar var samþykkt samhljóða ályktun um baráttu gegn orðræðu hryðjuverkasamtaka. Í ályktuninni var kallað eftir því að aðildarríki ynnu markvisst gegn áróðri ofbeldisfullra öfgahópa. Bent var á að jákvæð og hnitmiðuð skilaboð gætu unnið gegn orðræðu hryðjuverkasamtaka og sýnt fram á hræsni þeirra. Slík skilaboð væri hægt að byggja á sameiginlegum siðferðislegum gildum sem myndast bæði í mannréttindasáttmála Evrópu og íslamstrú. Þeim tilmælum var einnig beint til ráðherranefndar Evrópuráðsþingsins að útbúa leiðbeiningar fyrir aðildarríkin um hvernig best mætti vinna gegn áróðri hryðjuverkasamtaka. Í umræðum sagði Morten Wold, þingmaður frá Noregi, nauðsynlegt að mæta unga fólkinu á sama vettvangi og hryðjuverkamennirnir nota til að reyna að ná til þeirra, þ.e. á samfélagsmiðlum. Skýrsluhöfundur benti á að í baráttunni gegn hryðjuverkasamtökum, líkt og í baráttu við uppreisnarmenn, væri nauðsynlegt að vinna hug og hjörtu almennings. Það væri hægt að gera með því að beina sjónum að því sem sameinaði fólk og með því að Evrópubúar væru stoltir af sameiginlegum gildum sínum.

Í ályktun um fjölbreytni í stjórnámum var kallað eftir aðgerðum til að auka þátttöku minnihlutahópa í stjórnámum. Þjóðþing eru hvött til þess að tryggja gagnsæi og aðgengi og stjórnámálflokkar hvattir til þess að vinna að jafnrétti og fjölbreytni í flokksstarfi sínu. Í ályktuninni var bent á að meðal stjórnámamanna í Evrópu væru hlutfallslega fáar konur, afkomendur innflytjenda, hinsegin fólk og fatlaðir. Þessi staðreynd ýtti undir þá ímynd að stjórnám væru vettvangur hvíttra karlmannna yfir fimmtugu. Aukin fjölbreytni meðal kjörinna fulltrúa mundi bæta ákvarðanatöku þeirra og auka traust almennings á stjórnkerfinu.

Í ályktun um aðgengi og aðstæður fyrir fatlaða fanga voru aðildarlönd Evrópuráðsins hvött til þess að aðlaga löggjöf sína til að tryggja fötludum föngum viðeigandi aðbúnað. Kallað var eftir greiningu á þörfum fatlaðra fanga, hvort sem fötlun þeirra væri líkamleg, andleg eða í formi greindarskerðingar. Í tilmælum til ráðherranefndar Evrópuráðsþingsins var kallað eftir

rannsókn á löggjöf aðildarríkja og framkvæmd þeirra hvað varðar fangelsisdóma yfir einstaklingum með fatlanir.

Samhliða fundi stjórnarnefndar var haldinn fundur sérnefndar um hlutverk og verkefni þingsins (e. *Ad Hoc Committee on the Role and Mission of PACE*). Formaður sérnefndarinnar og forseti Evrópuráðsþingsins, Michele Nicoletti, tilkynnti á fundinum áætlun sína um að halda fund sameiginlegrar nefndar Evrópuráðsþingsins og ráðherranefndarinnar (e. *Joint Committee*) samhliða júnífundum þingsins. Lýsti hann óskum sínum um að umræðum í sérnefndinni gæti lokið í júní og að nefndin vísaði tillögum sínum áfram til þingskapanefndar og framkvæmdastjórnar Evrópuráðsþingsins. Nicoletti hefur tekið saman tillögur landsdeilda og flokkahópa til umbóta innan Evrópuráðsþingsins í minnisblað sem hefur verið grundvöllur umræðna í sérnefndinni frá því í mars. Þetta minnisblað var gert opinbert í vikunni eftir fundinn í Zagreb.

Frekari upplýsingar má nálgast hjá ritara Íslandsdeildar og á vefsvæðinu [www.assembly.coe.int](http://www.assembly.coe.int).